

Sco ün mosaïc d'Alesch Vital

Marcurdi passà ha gnü lö a Scuol la vernissascha dal cudesch «Alesch Vital 2005 – 1964». Alesch Vital ha creà ün «portacudesch» bel ed apostà pella vernissascha da seis cudesch.

Alesch Vital ha creà ün «portacudesch» bel ed apostà pella vernissascha da seis cudesch.

Alesch Vital as pusiziunescha in ün chantun da la Galleria Rablüzza, circondà da differentas ouvras ch'el ha creà d'ürant ils ultims ons. Sur sias spadlas penda ün patent da fier. I's tratta d'ün «portacudesch» inventà e realisà da l'agrartist bel ed apostà pella vernissascha da seis cudesch «Alesch Vital 2005 – 1964». Cun seis beret, la barba grischa e ls ögliers da leger para el la persunificaziun d'ün artist cosmopolit. Alesch Vital es però bler daplü. Hans-Peter Sinniger scriva al cumanzamaint dal nouv cudesch: «Alesch Vital tocca – quai as poja dir cun tuotta modestia – pro la spezcha extraordinaria dals multitalents.» El nun es be paura da muntogna, dimpersè eir activist politic. El nu creescha be ouvras d'art our dad üsaglias veglias, dimpersè es eir ün farrer, ün «capriculartist» ed ün istoriker contemporan.

Cultura, politica, agricultura

Amo avant cha'l cudesch «Alesch Vital 2005 – 1964» es gnü preschantà al public, ha'l fingià survgni il premi da la «Schweizerische Arbeitsgemeinschaft für Berggebiete» (SAB). «Bellas ouvras e bunas acziuns. Werkbuch 2005 – 1964», es il suottitel dal cudesch. I's tratta d'ün'ouvra cumplexsiva chi descriva cun texts e purtrets la vita e l'art d'Alesch Vital. Cultura, politica ed agricultura sun ils temas principals dal cudesch. Il purtret ha priorità. Ultra da las fotografias dals ogets ch'Alesch Vital ha creà, vegnan amis e cuntschaints da l'agrartist a pled. Anecdotas, artichels da gazetta, manifests politics o chartas a la regenza grischuna fan part da l'ouvra. Is pudess congrualar quist cudesch cun ün mosaïc ingio cha mincha cuntribuziun cumplettescha la vita da ed intuorn Alesch Vital d'ürant ils ultims 61 ons.

Cur cha turists dvaintan beschs

La cronologia dal cudesch funcziuna viceversa, dimena cumainza pro'l preschaint e finischa pro'l passà. «L'idea es quella chi nu's po vairamaing verer inavant i'l futur, dimpersè i's po be verer inavo», declera Alesch Vital. I'l passà guarda per exaimpel Chasper Pult chi quinta l'anecdota co cha seis ami ha survgni seis nom. Quel ingrazcha il paura da chavras nempe a Gudench Barblan e seis «Alesch d'Uina». Alesch deriva dal nom grec Aléxios e significa «defensur» – ün nom chi s'affà dimenà stupend per l'activist da l'ambient e dals drets umans. Ün'otra anecdota divertenta descriva seis anteriur vaschin Jürg Brosi. Per as proteger da bikers sün sia prada ha Alesch Vital fat la dumonda pro'l chantun da fabricar üna saiv. Sco motiv ha'l indichà: «Touristen abgrenzen». Pür cur ch'el ha corret «Touristen» cun «Schafe», ha il paura da muntogna survgni il permiss per fabricar la saiv.

Ün appel per s'ingaschar

Il cudesch «Alesch Vital 2005 – 1964» nun es però be ün cudesch d'istor-gettas divertentas. Cun sföglier las 203 paginas survain il lectur ün'invista i'l svilup creativ d'Alesch Vital, ill'istor-gia da l'assimilaziun da sia famiglia a Tanter Dossa sur Scuol ed impustüt illa vita politica dal paura da muntogna. L'ouvra es gnüda creada i'l decuors da duos ons e mez cun l'agüd da blers amis e sponsuors. Il concept e'l layout han fat Andreas ed Elisabeth Farnertobler. «Cun üna mappa ch'eu nu rivaiva bod na da portar suna viagià a Turich e tils n'ha surdat meis passà», quinta Alesch Vital. Per el es il cudesch ün sguard inavo ill'istorgia contemporana e quai na be da sia vita, dimpersè dal temp. Uossa es il cudesch sül marchà ed Alesch Vital as giavüscha be amo: «Il lectur dess avair plaschair da quist cudesch ed eir survgnir ün pa il curaschi da s'ingaschar per quai chi til es important».

Quelle: anr Autor: Fadrina Hofmann (Vallader)

Ort: 7500 St. Moritz

Datum: 19.08.2006

Rubrik: Novitèds Rumauntschas